

## ‘Roland Peterson ta e godfather di nos cuerpo cu nos ta conoce awe’

ORANJESTAD – Ayera tardi a tuma luga e acto di entiero di e prome korpschef di nos cuerpo policial (KPA), Roland Wilbert Peterson, kende a fayece dialuna ultimo.

Durante e acto di entiero aki, cuerpo di polis di Aruba a duna tur honor na kende historicamente a bira nan prome kopschef, despues cu Aruba a logra su Status Aparte. E actonan aki a tuma luga tanto na cas funerario Aurora, y tambe na su ultimo luga di sosiego den santana na Sabana Basora.

### Reconocimento

Vocero suplente di polis, Lili-ana Rasmijn a declara na Bon Dia Aruba cu nan a organisa un acto di entiero cu polis uniforma pa duna honor na e feliz memoria di sr. Peterson. E ta considera cu tabata un deber di e cuerpo aki, ya nan ta orguyoso cu sr. Peterson kende tabata nan prome alto comisario di polis di Aruba como pais.

Sra. Rasmijn a bisa cu e ta sumamente orguyoso cu aña pasa, den e mesun luna di december, nan a traha un video cu tur e alto comisarionan pa nan desea Aruba Bon Pasco y Bon Aña. E ta lamenta cu net un aña despues e mesun video nan a uza pa recorda sr. Peterson.

Alto comisario di polis, Dolfi Richarson a dicidi di organisa un acto di entiero cu tur honor oficial pa sr. Peterson, manera mester ta. El a declara na e matutino aki cu sr. Peterson a asumi un responsabilidad grandi como hefe di cuerpo di polis, ora cu Aruba a haya su Status Aparte na 1986. Nan a dun’e tur honor y acto protocolario, ya cu merecidamente sr. Peterson ta merece e elogio y reconocimiento, ya cu e ta e ‘godfather’ di nos cuerpo cu nos ta conoce awe.

“Na momento cu Aruba a separa di Antia, e meneer aki a tuma encargo sin sa si e lo tin suficiente manpower of material.” El a agrega cu sr. Peterson e tempo aya a ‘keep the organization running’.

E ta haya cu danki na e terminacion di sr. Peterson pa tuma e reto aki, awe nos tin un cuerpo policial y nan tin cu sigui cu e herencia cu el a laga atras. E ta spera cu cuerpo policial por sigui desaroya su mes. E no tin duda di esey mirando e calidad di e personal. Nan lo percura pa

sr. Peterson su soño di haci di polis un organisacion bon pa un organisacion excelente por sigui.

### Recuerdonan

Un frase ta bisa cu ‘esun cu ta biba sin amigo ta muri sin laga recuerdo atras’, y sr. Peterson a laga hopi recuerdo atras, no solamente cerca su famia manera su ruman muhe Molly Anne Peterson y Ryan Peterson, kendenan a dirigi palabranan yen di hopi sentimento y bunita recuerdo di nan ser stima. Sino tambe cerca su colega y amigo, Alvin Nectar.

Sr. Nectar a bisa cu sr. Peterson tabatin hopi curashi ora cu polis a duna su prome paso como institucion independiente di Antia. Na 1986 ora Aruba a drenta Status Aparte, y polis como organisacion a perde mas cu 40 miembro cu a bay Antias. “No tabatin nada, nada mes...”

El a recorda cu su persona hunto cu sr. Peterson como nan korpschef y otro colega- nan entre nan meneer Rasmijn y Ronny Nicolaas, nan tabata keda delibera te laat anochi riba e situacion cu e cuerpo di polis tabata pasando aden. “Pero nos a bringa y nos a sobrevivir pasobra ta nos pais,” sr. Nectar a bisa.

Un característica di dje tabata no mucho papiamento y bay pa e meta y asina el a crea e fundeshi pa e cuerpo cu awe nos ta conoce. Sr. Nectar cu hopi emocion a recorda situacion cu cuerpo policial a pasa aden, y cu awe e mes ta sinti orguyo di e herencia cu Roland y otro nan a laga atras, y cu nan coleganan awor a tuma over. “Mi ta sinti mi orguyoso di nos korp cu nan a tuma over.”

### Mentor

Comisario Truddy Hassell a bisa cu e concepto cu e tin di sr. Peterson ta esun di un ‘persona ehemplar y un persona integro’. Na momento cu sra. Hassell a yega di asumi algun di su funcionnan den cuerpo policial, el a yega di acerca meneer Peterson caminda di un forma calma e tabata dune conseho. Pero tambe el a dune apoyo y guia pa tuma e decisionnan correcto. “Pa mi e tabata un tipo di mentor,” el a bisa.

John Larmonie di e seccion di conscientisacion y prevencion di criminalidad di cuerpo policial a bisa cu sr. Peter-



son tabata un polis ehemplar durante su trayectoria den e instituto aki. Un recuerdo

inolvidabel pa sr. Larmonie ta cu sr. Peterson tabata e korpschef cu el a huramenta su

dilanti ora cu el a bira polis na aña 1988.

Continuacion na Pagina 16



## ‘Roland Peterson ta e godfather di nos cuerpo cu nos ta conoce awe’

Continuacion di Pagina 15

